

Jaorverslag Carnavalsvereniging 'De Spurriemok' **Seizoen 2007 – 2008**

7 x 11 'de Spurriemök'. Ut seizoen 2007-2008 gut de geschiedenis ien as ut seizoen van os 77^e verjurdag, as ut seizoen van ut boerebrudspaar Martien en Jessy Steeghs, as ut seizoen van Jeugdprinses Maartje, Jeugdvorst Siem, Jeugdnar Jelle, as ut seizoen welk ut leaste is ien raodslejek van Johan en Marc, as ut seizoen van un consequent altied uut de maat klappende Prins, as ut seizoen van Prins Jos d'n Twedde en Prinses Anne-Marie en helaas ok as ut seizoen van enne fantastisch goeje Vorst den dur mit gut stoppe. Teaves gut ut de geschiedenis ien as wederom un fantastisch seizoen.

Ut bestuur bestond uut:

- voorzitter Hans Loonen
- vorst Erik Flinsenbergh
- penningmeester Ron Sanders
- waarnemend sik Ruud Zanders
- bestuursleje: Jacquo Gerritse en Rob Pluk
- veul hulp van Linda van Deurzen

En kwaam 9 kier bej-en op verschillende platse.

De raod van elluf bestond uut:

Erwin Steeghs, Stef Claessens, Johan Craenmehr, Martijn Drabbels, Emiel Evers, Jan Classens, Pascal Classens, Roel de Rijck, Fabian Voermans, Dave Clephas, Tom Loone, Jop (mit en p) Loone, Job (mit en b) Geerets, en Marc Zanders.

En kwaam 7 kier bej-en ien os spiksplinterneje vergaderhol, de loods van Hans en Monique aan ut Riebroek.

Net as alle andere jaore begos ut seizoen wer op dun ellufde van dun ellufde. Ut was enne zondag en we begosse dit jaor mit ut Prins raoje. 's Aovus kwame we bej-en ien d'n Terp. De bedoeling was gewist um op dizze aovund de jubileumCD te presentiere. Mar dur diverse umstandighede is dat un jaor uutgesteld. Wel wiere dur alvast enkele liedjes ten gehuure gebrocht mit mitwerking van What Ever.

De zaoterdag daarop, 17-11, was ut vorsteraodsbal. Dit kier georganiseerd dur ut ok en jubilerende vereniging, 5 x 11 de Pielreuze uut Ysselsteyn. Osse Vorst Erik stond hier vur de leaste kier op de plenk en kwaam goed vur dun dag mit en verhaal aover wat dur allemaol wel en allemaol nie veranderd was ien 7 x 11 jaor.

Erik, os complimente vur ow verhaal en wej zien blie dat geij ok buute Oeldere os vereniging moj wet ner te zette.

Ut programma was umgegoeid. Diels umdat ut mar en hiel kort seizoen zij werre en diels umdat we dat ok is gewoen won gaon probiere. Dit hielt ien dat we al ien November enne neje Prins uut zun laote komme.

Zondag 25 november was ut dan zover. We begosse wer ien den Terp mit ut aftreje van Prins Rob en Prinses Linda. Nog iene kier terugblikke dur de ex-Prinse van de leaste 3 jaor oftewel de toppers, nog iene kier enne speech van Rob, en zellufs nou ok van Linda, nog iene kier chi-

chi-wa, nog iene kier 'zonne goeje hebbe we nog nie gehad' en dan hup de mantels af en mit z'n alle naor de Liende.

Un bitje latter as 15.11 uur ging de buhn baove oop en dur stond dizze kier is niks op ut podium. Dur hing allien en groet bord 'De Spurriemök 7 x 11'. Vorst Erik liet 7 Prinsekandidate naor boave komme, stelde ze en antal verkiersvraoge en liet de minse regelmaotig achter op en scherm an de hand van os mökkewagentje en antal verkiersregels zien.

Den Prins den nog nie bekend was wier en bitje ongeduldig en douwde alvast de deur op de buhn oop. Mar dat vond ozze vurzitter Hans nie goed en den douwde de deure wer dicht. De spanning wier opgevoerd en Vorst Erik was toe an de leaste 11 regels. Hej zette veul minse op ut verkierde bien en daor kwame vanaf buute mit ut Mökkewagentje naor binne: Prins Jos den Twedde en zien Prinses Anne-Marie. Jos wet van anpakke en laot dat ien ziene urste speech merke. Hej werkt metien efkes 2 weddeschappe af:

- Marian Nelisse wert nar gemakt, zoeas oeit beloofd dat zej nar zuy werre as Jos prins wert
- De bus vur ut eier eate het Jos bej zich

Ut autooke ging wer naor achter en vervolgs was ut de beurt an de jeugd. Nao 7 vraoge an de kiender en hiel wat 'jumpe' ging Vorst Eric aover tot de 11 regels en daor kwaame ze vanachter uut binne reje mit ut mökkewagentje: jeugdprinses Maartje dun urste, jeugdvorst Siem en jeugdnar Jelle.

Toen was ut de beurt an de boerebrulluftcie, de cie mit veul carnavalsgekke van buute de raod. Dees commissie het wederom alles m.b.t. de boerebrulluft geregeld op en complimentwaardige manier. Bej dizze dus. Ut uutkomme ging an de hand van en spel, waornao iemand anders vur den dag kwaam as wat egeluk leek, en wel Boerebruudegom Martien en Boerebruud Jessy.

Zoe, de vurgangers zien wer bekend en laot nou de bals mar komme!

Op 8 december zien dur un antal roadsleje mit Prins Jos, Prinses Anne-Marie, Vorst Erik en de CV van Leune naor Berge gewist, waor un Prinsetrefte was mit veul bekende artieste. Prinses Anne-Marie was ien dun zuvvende hemel dat zej urre groete favoriet Beppie Kraft van zo dicht bej kos bewondere. Dat Anne-Marie netjes is opgevoed bleek mar wer is. Want zej geaft netjes alles terug wat ze het mitgenome.

6 januari, Prinsereceptie. Altied wer ien van de mojste daage ut prinsepaar en ut jeugdtrio. Ut was druk, ut was gezellig, dun umzet was goed. We hebbe nao afloep van de receptie dur nog en moj feesje van gemakt. Zellufs de joekskapel zej nao afloep dat zej ut un prachtig fiest han gevonde.

Ien dun Terp was ut 's aovus nie mer zo druk, mar dat kriegde bejna vanzelluf as iederien ien de Linda zich al hielmaol kapot rent ien de polonaise.

Prins Jos, Prinses Anne-Marie, Jeugdprinses Maartje, Jeugdvorst Giel, Jeugdnar Jelle en wej allemaol kunne wer terugkieke op un hiel geslaagde dag.

Ien os neje programma ware dit jaor de bonte aovunde op 12 en 13 januari. Ok nej was dat ut op enne zoaterdag en zondag was. Zoe-as gewoonluk op zaaterdag hartstikke uutverkocht en op zondag zaate dur wat mier minse ien de zaal dan normaal op vrejdag.

Dun aovund begint mit un dansje van de 'kiender van de raod'. Zej liete zien dat zej echt wel un stuk beater kunne danse dan hun vaders en moeders.

Daornao kwaam dur unne ADHD-brandwerman ut prodium. Dit jonge kelleke uut Holthees liet de zaal geregeld lache. Hej praote gewoon Nederlands en dat klinkt toch en beetje gek op ozze bonte aovund.

Daornao kwaam de durpspolitiek op ut podium. Dora haj nie Drieka mitgenome, mar hurre kel Hannes. Same nome zej de gebeurtenisse en de minse ien os durrep op de hak. Hannes en Dora moj vertolkt dur Hans Loone en Bep Geerets.

As volgende act kwame dur 1 paoter en 6 nonne de buhn op, onder de naam non-actief. Vur hun doen ware dees minse nou juist best wel actief. Zej danste en jumpste dur lustig op los. Den Pater Bas Custers en de actieve nonne: Erwin Steeghs, Stef Claessens, Job Geerets, Stan Steeghs, Freek Steeghs en Freek Smulders.

Tied vur pauze mit os welbekende lekkere brudjes vur slechts 1 munt.

Noa de pauze kwaam Kuep de buhn op. Hej kwaam de liefde bringe mit enne hoep kwats, of ge kunt ok zegge 'hej brocht enne hoep kwats mit liefde'. Kuep wier gebrocht dur Johan Verdeuzeldonk mit op de achtergrond gitaargetokke van zien dochter Brenda.

Ok dit jaor was dur wer enne dans, nou gebrocht dur de Dansgroep XL. Dit ware de megjes die mit verschillende raodsleje vreje of dit op zien minst gear zun doen, oftewel Elle, Marloes, Paulien en Moniek.

Nao den dans kwame de tonielmeesters ien actie en toen zej klaor ware stond dur en complete kermiskraom op de buhn. Mit veul kabaal kwaame Sjak en Sjek op de buhn. Zej vertelde van alles en niks. Niks wat nie leuk was en alles wat um te lache was. Al jaore doen zej same mit veul succes mit en ok dit jaor was ut wer geweldig moj. Sjek en Sjak dur Marco en Peter. Vervolgus wier ut enne dolle boel op de buhn mit Floortje Peters en Tamara Konings die enkele top carnavalsslagers van hunzelluf ten gehuure brochte mit as absolute kraker 'vrolukke Jan'.

As slotact stonde dit jaor de two petjes uut Melderse op de buhn. Enne geweldige kraker waor ut publiek ok zichtbaar van genoot.

Toen nog de finale en wiere de grimeuses Nel en Anja en ut licht en geluid Berna en Erik al iederien den verder nog bedankt mos werre, bedankt. Iederien kwaam nog enne kier de buhn op en toen zaat ut dur alwer op.

Vrejdag 18 jannewari zien we naor Circus Mok gewist. Op zich enne moje aovund. Mar chauvinistisch as we zien, vonde wej natuurluk osse eige bonte aovund beater. Nao afloep ien de foyer danste de Prins van Venroj opvallend veul mit os Prinses Anne-Marie. Zuj den bej de venrojse boerebruudegom ien de lier zien gewist?

Toen wier ut zaoterdag 19 jannewarie. Dun dag van ut fiest der fieste, oftewel os Ald Wieverbal. De opening was fantastisch mit Prins Jos zien eige lieflied op de melodie van ut Dondert en ut bliksemt.

Dur was van de verklejng dur diverse groepe en minse wer veul werk gemaakt. Bej de groepe ging de urste pries naor 'de semi's' as prinsedragere van urre semi-kammeraad Prins Jos. Bej de duo's ging de urste pries naor Math en Thej mit same 100. Alhoewel ut an de end van de aovund leek of ze ze nog nie ens mer alle 7 han.

Ja, wat motte we dur verder van zegge?

Moj, druk, gezellig, ut kos niet beater, aggregaat van 100 KVA, complimente, bier, muziek, polonaise, de mok is los, gladde vloer, bier, kaoje, en nog gladdere vloer, bier, diesel vur dun aggregaat, en knalfiest, bier, afgeloepen, eier eate, knalfiest ien dun kop 's mergus vroeg en de penningmeester koppien van ut financiele resultaat van dizze aovund.

Oftewel: dit was echt ut fiest der fieste. Vurrij jaor al en kej goej band mit de Towerband, mar dit jaor aovertrof alles: Aparty die werkeluk dun ganse zaal op zien kop zette en iederien duj dan ok mit. Prins Jos, Prinses Anne-Marie en os Boerebruudspaar Martien en Jessy zien

dur nou nog van onder de iendruk van hoe zej vanaf ut podium de hiele zaal tekier zaage gaon.

Nao afloep is de raad eier gaon eate bej Job geerets, waor Bep de eier moog bakke. Stef Claessens was compleet van veur tot achter uut zien boks gescheurd. Anne-marie woj den wel neje, de boks dan uiteraard, as Stef de boks metien bej Geerets uut zuj doen bej. Mar Stef ok nie achterluk en lupt urst naor huus, pakt zien fiets, fietst terug, trekt zien boks uut en fietst ien zien onderboks naor huus. Op de vraog waorum zoe, is ut antwoord: hej haj genne zin um ien zien onderboks naor huus te loepe.

20 jannewari is os Prinsepaar naor ut korfbal van SVOC wist te kieke. Toevallig was de CV van Cassele dur ok. Of ut gebaat het durf ik ierluk gezet nie te zegge, mar dat ut gezellig was, geluuf ik vast wel.

Op 23 jannewari was wer de JVV-aovund. De opkomst was goed en de gezelligheid was dur wer. Mat en Thej ware dur ok wer mit hun 'same 100'. Mar nou kosse ze toch echt nie winne, umdat dur minse zat ware die same wel 150 ware. Rene Smets was dur wer, de volksdansgroep was dur wer, Hannes en Dora ware dur en 2 zangers uut Melderse ware dur. Al mit al enne moje aovund waor iederien den dur gewist is van het genote.

Vrejdag 25 jannewari zien we mit en vrej groet antal naor ut Ald Wieverbal ien Cassele gewist. Hup, mit os Mökkewagentje naor binne en mit fieste. Ut was hiel anders as wej ien Oeldere gewend zien, mar evegoed biestig gezellig. De Prins van 't Ven uut Venlo was dur ook. Ut Mökkewagentje wier dan ok goed gebruikt: 3 Prinse + os Prinses dur op en scheure mar dur de zaal.

De Schajj uiteindeluk viel mit, Rob Pluk han ze onder ut pisse en ander muts op gezet zonder dat hej ut gemerkt haj, mar dat was ut dan ok zo'n bietje.

Zaoterdag 26 jannewari hebbe we wer dun krant verkocht.

Wiste gej dat:

- daor wer hiel vur werruk ien zaat
- dur 2 veurkante an dizze krant zaate
- Prins Jos lang nie zo sterk is as hej op iene vurkant liekt
- Dur enkele neje rubrieke ien de krant stonde
- Dur ok WC-krakers ien stonte
- Dur en antal interviews ien stonte
- De raodsleje ien ut echt veul knapper zien dan dat ge ien de krant kunt zien
- Dur en terugblik op de leaste 11 jaor ien stont
- Dun puzzel zo moeiluk was, dat wederom allien Mark Kleeve um op kos losse
- Dun krant wer gewoen hielemaol top was!

Dur zaat enne jubileumposter bej dizze krant den ge vur de raam kost hange en dit han ok echt veul minse ien Oeldere gedaon. Ge kost dur enne individuele pries mit winne en enne straatpries. Latter hieraover mier.

Ozze Prins den woj mar aoveral naor toe. Dus hup ok op zaoterdag 26 jannewari naor ut Vorstebal ien Rooj. Conclusie: te wennig Obers, wel gezellig, mar wej hoeve os ien Oeldere nie te schame. En umdat ze ien Venroj toch illegale zat hebbe, han wej ok mar enne illegale mitgenome.

De Prins van Venroj danste wer opvallend veul mit os Prinses. Liere ze ut daor nou noeit?

En dan is ut alwer donderdag 31 jannewari, vlak vur dun officiële carnaval. Tradisiegetrouw ware we wer uutgeneudigd bej de SJMO. Gezellig um efkus an te gaon en vast ien de stemming te komme.

Vrejdagmiddag volgt dan urst de kienderoptocht en ginge we mit alle kiender van Oeldere ien enne lange optocht ut Jeugdtrio ophale bej Jeugdprinses Maartje. Ut jeugdtrio sloot an ien enne cabrio en zoe ginge we allemaol naor de linde, naor ut scholcarnavalsbal. Aover de toekomst hoeve we os gen zurreg te make, want hier wier al flink carnaval gevierd

's Aovus was ut ziekebezuuk gepland. Un antal jaore geleje ware we bej Ria Hebing op bezuuk gewist en dat was van beide kante zo goed bevalle dat dat vur dit jaor wer geregeld kos werre. Ria wardierde ut ien ieder geval zier dat ut Prinsepaar mit Vorst Erik wer op bezuuk kwaam.

Zaoterdagmerrege 2 fibbrewari is dur urst en bezuuk gebrocht bej ut klenst mokske. Dit jaor Wout Michels. Robert en Corin doen ut dur gewoen um. En antal jaore geleje waare zej dur ok al ien geslaagd um ut klenste mokske te fabriciere. Zey hebbe dan ok plechtig beloofd dat as dur nog mier kiender komme, dat allien nog mar klenste mokskes meuge zien.

's Middags naor de gemeant. Ut was moj op de gemeant. Opperburger Waals, Prins van Rooj, Vorst Milton van Rooj en vural Vorst Rob uut de smakt names de kerkdurrepe han goeje verhale.

Hiernaos koste naor ut schouwburgplein vur de vastelaovusroets. Wej as de spurriemok hebbe echter wederom beslote um hier nie an mit te gaon doen. Wej stoan vur os eige durrep en nie vur rooj. Wej zulle echt nie Oelderse minse gaon stimuliere um naor Rooj te gaon as wej zelluf nog programma hebbe ien Oeldere. Nie umdat wej wat tigde Rooj hebbe, mar gewoen umdat wej dur vur Oeldere zien, dun Oelderse carnaval ien iere wille halde en daormit bej wille drage an de leafbaarheid van os durrep.

Um 19.00 uur was wer de heilige mis. Dit jaor wer goed bezocht. Ok dit jaor wer mit de moje muziek van What Ever. Zey han dur zang bej en dat klonk os, ien os oere tenminste, werkeluk as muziek ien de oere. Geweldig moj gedoan.

Traditioneel duj de Vorst wer ut slotwoord. Dit jaor haj Erik ut aover de saamhorigheid ien ut durrep en dat we daar best wel is bej stil meuge staon. Kortum un slotwoord mit en boodschap en ok dat huurt bej carnaval.

Nao de mis ginge we vur dun 20^{de} kier bej pastoer op de koffie.

Ien de pastorie kreeg pastoer vervolgus wer en moj carnivalsonderscheiding en umdat vurrig jaor zien medaillekast al vol haj, han wej de meast technische en handigste van de raad de opdracht gegeave um en nej medaillekesje te make, oftewel Erwin Steeghs. Fanatiek as den jong is, ging hej vol enthousiasme an de slag. En dur is en kesje uutgekemme, waormit pastoer nog zo'n beetje 100 jaor pastoer mot blieve um ut kesje en klen beetje vol te kriege. Names pastoer: Erwin bedankt!

Nao ut korte bezuuk an de pastorie volgde ut Mokkebal ien de linde.

Aangezien Prins Jos toen hej net Prins was mit en blauw oeg rondliep, wier dur geopend mit enne boksbal, waar Jos is en paar kier tigde an mos bokse. En toen kos ut fiest beginne. En fiest wier ut. We han en dure band iengehuurd vur wat achtergrondmuziek en de rest van de aovund wier gemakt dur de mok is los, de raad en alle aanwezige die dur geweldig veul zin ien han. Af en toe en beetje lomp, mar net nie te.

Nao afloep, dit kier wel de gebakke eier.

Al mit al enne aovund waor ge best wel wat kritiek op kunt hebbe en ok wel meugt hebbe, wat muziek betreft dan, mar verget nie dat toch iederien zich wer gewoon goed vermakt het en dat is ut belangriekste.

Op dizze zaoterdagaovund wiere dur ok nog verschillende prieze uutgereikt. Diverse minse binne os verieniging han wat ideeje en prieze verzonne, zonder dat ze ut van elkaar wisse, en zoe mosse dur hiel wat prieze uutgereikt werre:

- Bob Versleje won en serenade van de raod + ontbijtje vur 4 persoene vur zondagmerge 09.00 uur. Dit umdat hej zaoterdagaovund vur 21.30 uur binne was
- Jan Nelissen won de individuele posterpries en ontbijt bej um thuus, verzurgd dur 'de spurriemök', same mit Prins, Prinses, Vorst en ut Jeugdtrio.
- De hoofdstraot won de straotpries van de posters. Zej kriege vreedag naor de carnaval en VIP-behandeling bej de trekking van de loeterej van de fanfaar.

Zondagmerge, 09.00 uur, de hiele raod was anwezig. Zellufs Stef Claesses was dur ok. Hej haj zien pak nog nie uutgehad. Mit zien alle wier dur bej Bob Versleje vur de deur en lied gezonge en toen de hiele familie wakker was, mooge we allemaol naor binne. Enne gewonne pries den ze nie verwacht han dat ze ok zun kriege, mar wier wel gewardierd.

Zondag rond de middag wier, same mit de mok is los, urst Jeugdprins Maartje afgehald an de Leng en vervolgus ginge we naor dun Bremmenkamp um Prins Jos en Prinses Anne-Marie af te hale. Bej beide huus wier enne polonaise geloepe en vervolgus wiere ze snel op dun wage gesmete um naor dun terp te gaon.

Hier was wer dun brunch vur de raod, de jeugdraod, de mok is los en dun anhang. Dun brunch was goed verzurgd. Dur wiere nog efkus wat medailles uutgereikt en toen mosse we alwer naor de Linde.

Ut kienderbal was gezellig en goed bezocht. Op zondag zaat dur gen band, mar DJ Andre Bon Apart en dur wer en geweldig fiest van miek. De spurriemokske han goed hun best gedaon op de kleurplate en de pries wiere dan ok wer uutgereikt. Ut kienderbal was moj bezocht en errug gezellig.

's Aovus ien dun terp was ut moj vol en kej gezellig. Dur wier flink gehost en gespronge en de sfeer was goed. Ut biljart wier ondertusse traditiegetrouw mar wer is gebruikt. De balle schove dur aover hin, ien plats van rolle.

Iederien haj zich super geamusiert.

Carnavalsmaondag begos dit jaor mit ut ontbijtje bej Jan Nelisse. Dur wier flink gegeate en unne goeje bojem gelet vur de rest van de dag.

Ansluutend was ut snotneuzebal. Ut was moj schon ien de zaal. De vloer was vur de klenste en ok die kosse al moj carnaval viere.

's middags hebbe we urst mitgetrokke mit de roojse optocht. Mit osse wage, de kammeruj dur bej en os enthousiasme kwame we goed vur dun dag. We hebbe os zelluf mar wer gewoon dun urste pries gegeave van oelderse prinsewages ien Rooj en iederien wer blie.

Daornao snel terug naor Oeldere vur os eige kienderbal. Vandaag wer mit Andre bon appart. En appart was hej nog steeds. Iederien vond ut moj, grappig en gezellig. Wer gewoon enne geslaagde middag.

's Aovus ien dun terp ging iederien vort echt flink te kier. Gezellig en flink fiest.

Wout kreeg nog spontaan en goej idee vur dun optocht de volgende dag. Umdat hej gen tied mer haj um dat idee uut te werke, gaaf hej Lilian opdracht om de waage klaor te make. En Lilian die aarzelt dan nie en duut dat dan gewoon recht toe, recht an.

Carnavalsdinsdag

Ut begos an ut begin van de middag mit dun optocht. Andere jaore duj de helft van Oeldere mit en de helft stond te kieke. Dit jaor echter, duj $\frac{3}{4}$ mit en $\frac{1}{4}$ stond te kieke, mar dan wel 3 kier. Dur ware mar liefst 18 categorie-en en ien alle categorie-en wier allien dun urste pries beloond. Allien Daan Willems en zien kammeruj ware dur nie ien geslaagd um enne urste pries ien de wacht te slijpe. Zej ware dur ok de enigste ien de zaal mit enne twedde pries. Al mit al begint dun optocht vort echt urges op te lieke. Mit dank an un antal fanatieke jongere die vort moje wages make.

Umdat Daan Willems en kammeruj al jaore zeure dat zej ok enne medaille wille, haj Vorst Erik hier vur gezurgd. Zej kregene enne medaille gemakt van remschieve van vrachtwages. We verwachte dat we nou vur ens en altied van hun gezeur af zien.

Nao dun optocht volgde enne drukke middag ien de liende. Wederom haj de boerebrullufstcie zien uuterste best gedaon en wat mojs op de planke gezet. De familie wier vurgesteld en mede dur de kammeruj van ut boerebrudspaar wier dur en leuk stukse op de planke gebrocht. Vervolgus wiere Martien en Jessy Steeghs ien ut onecht getrouwd mit daornao en drukke receptie. DJ Andre bon appart stond ok wer te popele um te beginne en hej mier dur wer en dolle boel van vur jong en ald.

We slote wer af mit boeremoes, dit jaor ien d'n Terp, wat dur bej iederien goed ien ging. Durdat ut boeremoes ien d'n Terp was, liep de Linde wel op en bitje en rare manier leeg. Maar al mit al zeker gen verkierd experiment.

Um tien uur kwaam dur en end an de jeugdcarneval. De mok wier angestokt. Ut jeugdtrio en de jeugdraod han un moje carneval gehad en de traone bleve dan ok nie binne. De jeugdbals ware gezellig en de jeugd het zich goed uut kunne leave.

3 daag soos in 3 woorde: druk, het, gezellig.

Hiermit is alles beschreve. Ut was wer gewoen goed, we beginne dur an te wenne. Mar wej blieve ut prettig viende dat de soos dit duut. Dus bej dizze wille wej de jeugdcie bedanke vur alles wat zej vur de jeugd, mar ok vur de carnavalsvereniging doen.

Op carnavalsdinsdag noom Willeke Philipsen afscheid van jeugdcie van de soos. Uiteraard is dit ut pakkie an van de soos, mar bej dizze wille wej Willeke toch nog enne kier bedanke vur alles wat zej vur de carneval ien de soos gedaon het.

Ien dun terp was ut gezellig en erg druk. Dur wier nog flink gehost, gespronge en gedronke. Dit was al dun derde aovund dat dur enne hiele goeje DJ stond en dat makt mit zon fiest toch wel veul uut.

Om 23.45 uur kwaam dur toch un moment van afsluuting. Urst Piet Peters en Trees Willems bedankt, die stopte bej de mok is los. Vervolgus kregene Jan Classes, Dave Clephas en Ruud Zanders en onderscheiding van de Carnavalsvereniging umdat zej al 11 jaor lid zien van de raad of bestuur. Ok Anita Classes wier nog is extra bedankt vur alles wat zej vur os vereniging het gedaon.

Tot slot was ut leaste woord an Prins Jos en Prinses Anne-Marie.

Vervolgus ging iederien naor buute um de mok an te stoke. Toen we net buute ware was ut nog dreug en Prins Jos haj net tigde Erik gezet wat en geluk we toch gehad hebbe mit ut wear en dat ge as prins ut wear kriegt wat ge verdient, en 2 seconde latter gutste ut water uut de hemel. De Mök is wel angestokt, mar dat is ok alles wat ik dur van gezien heb, want iederien rende wer naor binne.

Vervolgus is dur ien d'n Terp nog en gezellig feesje gebouwd.

Woensdag opruume, ontnuchtere, eate bej Jos en Anne-Marie, nikse, 19.00 uur naor de kerk en vervolgus nog herring schelle ien den Terp. Ok dit is goed verzurgd en gezellig um wat nao te kletse. Tiggeworrig duurt dat herring schelle aoveriges vort tot 06.00 de volgende merge.

Seizoen 2007-2008 was un moj seizoen, mar nog nie gans af. Want ien November komme nog os jubileumfieste. Ien 2 weekende zal dur eigeluk en compleet carnavalsprogramma durhin gedrejd werre. Ien ding is nou al zeker: dat meugde nie misse.

Wej beginne dan dun 11-11 mit ut aftreje van ozze Vorst Erik en ut uitkomme van de neje. Mit alle jeugd die wej wer bej de vereniging hebbe, zien we echt nie bang dat dur genne geschikte kandidaat tusse zuj zitte.

Bej dizze wille wej alle Spurriemokke en spurriemokkinne, en ien ut bejzonder natuurluk ut Jeugdtrio, Boerebrudspaar Martien en Jessy en Prins Jos en Prinses Anne-Marie bedanke vur ut moje seizoen tot nog toe.